



3. Oktober 2019

UKA 2019/156  
Aqqalu C.Jerimiassen

**Uunga siunnersuut: Eqqumiitsuliornermik ingerlatsineq pillugu Inatsisartut inatsisaata allanngortinneqarnera pillugu Inatsisartut inatsisaat nr. xx, xx. xxx 2019-imeersoq. (Eqqumiitsuliornermik ingerlatsineq tamassuminngalu si-ammarterinermut aningaasaateqarfimmik tapiissutinik aqutsisussamik pilersitsinissamut inatsisitigut tunngavissat)**

(Ilinniartitaanermut, Kultureqarnermut, Ilageeqarnermut Nunanullu Allanut Naalakkersuisoq)

Takorluulaarsiuk ulloq ataasiinnarluunniit radiokkut, tv-kkut, pisiniarfinni, neriniartarfinni, biilini, timmisartuni, qarasaasiatsinni, mobiilitsinnilu nipiilersukkamik ataasinnguamilluunniit tusarnaarsinnaanngikkaluarutta. Sumiikkaluarussiluunniit eqqarsi tamaat qivialaarsiuk, pinngitsoorani eqqumiitsuliortup suliaanik takussasusi.

Eqqumiitsuliortup suliai qaqqumorsuaq piujuannartussaapput, qaqqumorsuaq inuunerput qalipaasersorlugulu kusassartuarpaat. Nunatsinni eqqumiitsuliortortavut annerusumik periarfissinnerusariaqarpagut killilersuinnarnagit. Tassaappummi nunatsinni aningaasaqarneranut aamma kivitseqataasut.

Eqqumiitsuliortut ersarissumik oqariartuuteqarput. Tamakkiinerusumik, ajornannnginnerusumillu qinnuteqarfissaminnik pisariaqartitsippu. Pisussaaffigaarpalut uagut taanna anguniassallugu. Pisussaaffigaarpullu inuunitta qalipaatai piujuartinniartuassallugit.

Eqqumiitsuliortullu eqqumiitsuliaminnik suliaqarneq pikkoriffigamikku imaanngilaq qinnuteqaasiornernut aamma ekspert-iusut. Tusartuartarpagummi kusanarluinnartunik, torrallataasunillu suliaqarsimagaluarlutik qinnuteqaasiaminnik itigartitaajuartut. Tassanilu aporfiusut marlussuupput:

Qinnuteqarfissat amerlasuut paatsiveerunnartarput. Qinnuteqaasiorsimatillunilu suliap pitsaassusaata nalilersorneqartarnera killeqarluni, qinnuteqaasiullaqqinnerinnaq apequtaavallaalersoortarluni. Tassa Naalakkersuisoqarfimmi qinnuteqaatinik suliarinnittut allaffissortuummata, eqqumiitsulianik nalilersuisuunatik. Eqqumiitsuliornermullu aningaasaateqarfik piviusunngoriarpalut eqqumiitsuliortut nalileeqataasinnaanngornissaat (sagkyndig sysytem) aamma kissaatigaarpalut.

Eqqaamassavarpullu eqqumiitsuliorneq kulturitut isigiinnarnagu, sunngiffimmi suliassaannartut isiginagu, kajumissutsikkullu sunngiffimmi suliassaannartut isiginagu, inunnguuseralugu piginnaasarujussuarmik pillit pikkorinnerujussuartik annertunerusumik inuussutissarsiutigineqarsinnaanissaa isiginiarnerusariaqaratsigu.



Savalimmiormiut qviaannarutsigit, uagutsinniiguna eqqumiitsuliullaqqinnerusimaneramik uagutsinniillu pikkorinnerusimaneramik amerlanerit inuussutissarsiuttit atoraat? Immaqaluunniit aaqqissuussaanertik, tapeeriaaserlu pitsasoq pikkoriffignerusimanerpaat?

Uaguttaaq aaqqissuussaanerput, tapeeriaaserpullu pikkoriffignerusariaqaratsigu, Atassummiit nuannaarutigaarput eqqumiitsuliornermut aningasaateqarfimmik pilersitsinissamut eqqumiitsuliornikkut inatsisitta aporfilersuutigisimasa massakkut allanngortissallugu suliarileratsigu.

Nuannaarutigaarputtaaq inatsimmut allannguummi, avataaniit aningasaateqarfimmut tapiisinnaaneq ammassamat. Kiisalu Naalakkersuisoqarfiup avataaniit siammertereqataasussatut isumaginnittussanik suliakkiisoqarsinnaalernissaa iluarisimaarpapput.

Atassummiit siunnersuut taperserlugu ataatsimitiliamut innersuupparput.